

四庫全書

集部

欽定四庫全書

集部

李義山詩集卷上

詳校官監察御史_臣查瑩

檢討_臣何思鈞覆勘

總校官檢討_臣何思鈞

校對官編修_臣戴聯奎

謄錄監生_臣袁懷璞

欽定四庫全書

集部二

李義山詩集

別集類一 唐

提要

臣等謹案李義山詩集三卷唐李商隱撰商
隱字義山懷州河內人開成二年進士釋褐
秘書省校書郎調宏農尉會昌二年又以書
判拔萃王茂元鎮河陽辟為掌書記歷佐幕
府終於東川節度判官檢校工部郎中事迹

具唐書本傳商隱詩與溫庭筠齊名詞皆縵麗然庭筠多綺羅脂粉之詞而商隱感時傷事尚頗得風人之旨故蔡寬夫詩話載王安石之語以為唐人能學老杜而得其藩籬者惟商隱一人自宋楊億劉子儀等沿其流波作西崑唱酬集詩家遂有西崑體致伶官有搨搨之譏劉攽載之中山詩話以為口實元祐諸人起而矯之終宋之世作詩者不以為

宗胡仔漁隱叢話至摘其馬嵬詩渾河中詩
詆為淺近後江西一派漸流于生硬麤鄙詩
家又反而講溫李自釋道源以後註其詩凡
數家大抵刻意推求務為深解以為一字一
句皆屬寓言而無題諸篇穿鑿尤甚今考商
隱府罷詩中有楚雨含情皆有託句則借夫
婦以喻君臣固嘗自道然無題之中有確有
寄託者來是空言去絕踪之類是也有戲為

艷體者近知名阿侯之類是也有實寓狎邪者昨夜星辰昨夜風之類是也有失去本題者萬里風波一葉舟之類是也有與無題相連誤合為一者幽人不倦賞之類是也其摘首二字為題如碧城錦瑟諸篇亦同此例一槩以美人香草解之殊乖本旨至于流俗傳誦多錄其綺艷之作如集中有感二首之類選本從無及之者取所短而遺所長益失之

矣乾隆四十六年十月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

李義山詩集卷上

錦瑟

錦瑟無端五十絃一絃一柱思華年
莊生曉夢迷蝴蝶望帝春心託杜鵑
滄海月明珠有淚藍田日暖玉生煙
此情可待成追憶只是當時已惘然

重過聖女祠

白石巖扉碧蘚滋
上清淪謫得歸遲
一春夢雨常飄瓦
盡日靈風不滿旗
萼綠華來無定所
杜蘭香去未移時
玉郎會此通仙籍
憶向天階問紫芝

寄羅劭興

棠棣黃花發
忘憂碧葉齊
人間微病酒
燕重遠兼泥
混沌何由鑿
青冥未有梯
高陽舊徒侶
時復一相攜

令狐舍人說昨夜西掖翫月因戲贈

昨夜玉輪明
傳聞近太清
涼波衝碧瓦
曉暈落金莖
露

索秦宮井風絃漢殿箏幾時綿竹頌擬薦子虛名

崔處士

真人塞其內夫子入於機未肯投竿起唯歎負米歸雲
中東郭履堂上老萊衣讀遍先賢傳如君事者稀

自喜

自喜蝸牛舍兼容燕子巢綠筠遺粉籜紅藥綻香苞虎
過遙知穿魚來且佐庖慢行成醕酌隣壁有松膠

題僧壁

捨生求道有前蹤
乞腦剗身結願重
大去便應欺粟粒
小來兼恐隱針鋒
蚌胎未滿思新桂
琥珀初成憶舊松
若信貝多真實語
三生同聽一樓鐘

霜月

初聞征鴈已無蟬
百尺樓南水接天
青女素娥俱耐冷
月中霜裏鬪嬋娟

異俗二首

時從事
嶺南

鬼瘡朝朝避春寒
夜夜添未驚雷破柱
不報水齋簷虎

箭侵膚毒魚鈎刺骨銛鳥言成謀詐多是憾彤襜
戶盡懸秦網家多事越巫未會容獺祭只是縱豬都點
對連鰲餌搜求縛虎符賈生兼事鬼不信有洪爐

歸墅

行李踰南極旬時到舊鄉
楚芝應徧紫鄧橘未全黃
渠濁村春急旗高社酒香
故山歸夢喜先入讀書堂

和孫朴韋蟾孔雀詠

此去三梁遠今來萬里攜
西施因網得秦客被花迷
可

在青鸚鵡非闕碧野雞約眉憐翠羽刮膜想金篦瘡氣
籠飛遠蠻花向坐低輕於趙皇后貴極楚懸黎都護矜
羅幕佳人炫繡桂屏風臨燭釵捍撥倚香臍舊思牽雲
葉新愁待雪泥愛堪通夢寐畫得不端倪地錦排蒼鴈
簾釘鏤白犀曙霞星斗外涼月露盤西妬好休誇舞經
寒且少啼紅樓三十級穩穩上丹梯

人欲

人欲天從竟不疑莫言圓蓋便無私秦中已久烏頭白

却是君王未備知

華山題王母祠

蓮花峰下鎖雕梁
此去瑤池地共長
好為麻姑到東海
勸栽黃竹莫栽桑

商於

商於朝雨霽歸路
有秋光背塢猿收果
投巖麝退香建
瓠真得勢橫戟
豈能當割地張儀
詐謀身綺季
良清渠
州外月黃葉廟前
霜今日看雲意
依依入帝鄉

華清宮

華清恩幸古無倫，猶恐蛾眉不勝人。
未免被他褒女笑，只教天子暫蒙塵。

楚澤

夕陽歸路後，霜野物聲乾。
集鳥翻漁艇，殘虹拂馬鞍。
劉楨元抱病，虞寄數辭官。
白袷經年卷，西來及早寒。

蟬

本以高難飽，徒勞恨費聲。
五更疎欲斷，一樹碧無情。
薄

宦梗猶汎故園燕已平煩君最相警我亦舉家清

江亭散席循柳路吟歸官舍

春詠敢輕裁街詞入半盃已遭江映柳更被雪藏梅寡
和真徒爾殷憂動即來從詩得何報唯感二毛催

潭州

潭州官舍暮樓空今古無端入望中湘淚淺深滋竹色
楚歌重疊怨蘭叢陶公戰艦空灘雨賈傅承塵破廟風
目斷故園人不至松醪一醉與誰同

贈劉司戶蕢

江風揚浪動雲根，重碇危檣白日昏。
已斷燕鴻初起勢，更驚騷客後歸魂。
漢廷急詔誰先入，楚路高歌自欲翻。
萬里相逢歡復泣，鳳巢西隔九重門。

哭劉司戶蕢二首

離居星歲易失望，死生分酒甕凝餘。
桂書籤冷舊芸江，風吹鴈急山木帶蟬暉。
一叫千迴首，天高不為聞。
有美扶皇運，無誰薦直言。
已為秦逐客，復作楚冤魂。
溢

浦應分派荆江有會源併將添恨淚一洒問乾坤

悼傷後赴東蜀辟至散關遇雪

劍外從軍遠無家與寄衣散關三尺雪迴夢舊鴛機

樂遊

向晚意不適驅車登古原夕陽無限好只是近黃昏

北齊二首

一笑相傾國便亡何勞荆棘始堪傷小憐玉體橫陳夜
已報周師入晉陽

巧笑知堪敵萬幾，傾城最在著戎衣。
晉陽已陷休回首，更請君王獵一圍。

街西池館

白閣他年別朱門，此夜過疎簾。
通月魄，珍簾接煙波，太守三刀夢將軍。
一箭歌國租，容客旅香熟，玉山禾。

南朝

玄武湖中玉漏催，雞鳴埭口繡襦迴。
誰言瓊樹朝朝見，不及金蓮步步來。
敵國軍營漂木柿，前朝神廟鎖煙煤。

滿宮學士皆顏色江令當年只費才

復京

虜騎胡兵一戰摧萬靈迴首賀軒臺天教李令心如日
可要昭陵石馬來

鄠杜馬上念漢書

一云五陵懷古

世上蒼龍種人間武帝孫小來唯射獵興罷得乾坤渭
水天開苑咸陽地獻原英靈殊未已丁傳漸革軒

柳

動春何限葉撼曉幾多枝解有相思否應無不舞時絮
飛藏皓蝶帶弱露黃鸝傾國宜通體誰來獨賞眉

渾河中

九廟無塵八馬迴奉天城壘長春苔咸陽原上英雄骨
半向君家養馬來

巴江柳

巴江可惜柳柳色綠侵江好向金鑾殿移陰入綺窻

咸陽

咸陽宮闕鬱嵯峨六國樓臺豔綺羅自是當時天帝醉
不關秦地有山河

同崔八詣藥山訪融禪師

共受征南不次恩報恩唯是有忘言巖花澗草西林路
未見高僧且見猿

聞著明凶問哭寄飛卿

昔歎讒銷骨今傷淚滿膺空餘雙玉劍無復一壺冰江
勢翻銀磔天文露玉繩何因攜庾信同去哭徐陵

聽鼓

城頭疊鼓聲城下暮江清
欲問漁陽搵時無補正平

送崔珣往西川

年少因何有旅愁
欲為東下更西遊
一條雪浪吼巫峽
千里火雲燒益州
卜肆至今多寂寞
酒壚從古擅風流
浣花牋紙桃花色
好好題詩詠玉鈎

代贈

楊柳路盡處芙蓉湖上頭
雖同錦步障獨映鈿塋篋
篋駕

鶯可羨頭俱白飛去飛來煙雨秋

桂林

城窄山將壓江寬地共浮東南通絕域西北有高樓神
護青楓岸龍移白石湫殊鄉竟何禱簫鼓不曾休

夜雨寄北

君問歸期未有期巴山夜雨漲秋池何當共翦西窓燭
却話巴山夜雨時

陳後宮

茂苑城如畫閨門瓦欲流還依水光殿更起月華樓侵
夜鸞開鏡迎冬雉獻裘從臣皆半醉天子正無愁

屬疾

許靖猶羈宦安仁復悼亡茲辰聊屬疾何日免殊
方秋蝶無端麗寒花更不香多情真命薄容易即
迴腸

石榴

榴枝婀娜榴實繁榴膜輕明榴子鮮可羨瑤池碧桃樹

碧桃紅頰一千年

明日

天上參旗過人間燭焰銷誰言整雙履便是隔三橋知
處黃金鎖曾來碧綺寮凭欄明日意池澗雨蕭蕭

飲席戲贈同舍

洞中屐響省分攜不是花迷客自迷珠樹重行憐翡翠
玉樓雙舞羨鷓鴣蘭迴舊葢緣屏綠椒綴新香和壁泥
唱盡陽關無限疊半盃松葉凍頗黎

憶梅

定定住天涯
依依向物華
寒梅最堪恨
長作去年花

贈柳

章臺從掩映
郢路更參差
見說風流極
來當婀娜時
橋迴行欲斷
堤遠意相隨
忍放花如雪
青樓撲酒旗

詠柳

已帶黃金縷
仍飛白玉花
長時須拂馬
密處少藏鴉
眉細從他歛
腰輕莫自斜
玳梁誰道好
偏擬映盧家

北禽

為戀巴江暖無辭瘴霧蒸縱能朝杜宇可得值蒼鷹石
小虛填海蘆銛未破矧知來有乾鵲何不向雕陵

初起

想像咸池日欲光五更鐘後更迴腸三年苦霧巴江水
不為離人照屋梁

楚宮

複壁交青瑣重簾掛紫繩如何一柱觀不礙九枝燈扇

金方石合
卷上
薄常規月釵斜只鏤水歌成猶未唱秦火入夷陵

柳

柳映江潭底有情望中頻遣客心驚
巴雷隱隱千山外更作章臺走馬聲

石城

石城誇窈窕花縣更風流
簾水去將飄枕簾烘不隱鉤
玉童收夜鑰金狄守更籌
共笑鴛鴦綺鴛鴦兩白頭

韓碑

元和天子神武姿彼何人哉軒與羲誓將上雪列聖耻
坐法宮中朝四夷淮西有賊五十載封狼生羆羆生罊
不據山河據平地長戈利矛日可麾帝得聖相相曰度

晏子春秋
仲尼聖相

賊斫不死神扶持腰懸相印作都統陰風慘

淡天王旗想武古通作牙爪儀曹外郎載筆隨行軍司
馬智且勇十四萬衆猶虎貌八蔡縛賊獻太廟功無與
讓恩不訾帝曰汝度功第一汝從事愈宜為詞愈拜稽
首蹈且舞金石刻畫臣能為古者世稱大手筆此事不

繫於職司當仁自古有不讓言訖屢顧天子頤公退齋
戒坐小閣濡染大筆何淋漓點竄堯典舜典字塗改清
廟生民詩文成破體書在紙清晨再拜鋪丹墀表曰臣
愈昧死上詠神聖功書之碑碑高三丈字如手負以靈
鼈蟠以螭句竒語重喻者少讒之天子言其私長繩百
尺拽碑倒麤砂大石相磨治公之斯文若元氣先時已
入人肝脾湯盤孔鼎有述作今無其器存其詞嗚呼聖
皇及聖相相與烜赫流淳熙公之斯文不示後曷與三五

相攀追願書萬本誦萬過口角沅沫右手舐傳之七十
有二代以為封禪王檢明堂基

令狐八拾遺

綯

見招送裴十四歸華州

二十中郎未足稀驪駒先自有光輝
蘭亭讌罷方回去
雪夜詩成道韞歸漢苑風煙催客夢
雲臺洞穴接郊扉
嗟予久抱臨邛渴便欲因君問釣磯

離思

氣盡前溪舞心酸子夜歌
峽雲尋不得溝水欲如何
朔

鴈傳書絕湘篁染淚多無由見顏色還自託微波

宿駱氏亭寄懷崔雍崔衮

竹塢無塵水檻清相思迢遞隔重城秋陰不散霜飛晚
留得枯荷聽雨聲

風雨

淒涼寶劍篇羈泊欲窮年黃葉仍風雨青樓自管絃新
知遭薄俗舊好隔良緣心斷新豐酒銷愁斗幾千

夢澤

夢澤悲風動白茅
楚王葬盡滿城嬌
未知歌舞能多少
虛減宮廚為細腰

贈歌妓二首

水精如意玉連環
下蔡城危莫破顏
紅綻櫻桃含白雪
斷腸聲裏唱陽關

白日相思不奈何
嚴城清夜斷經過
只知解道春來瘦
不道春來獨自多

謝書

微意何曾有一毫空攜筆硯奉龍韜自蒙半夜傳衣後
不羨王祥得佩刀

寄令狐學士

秘殿崔巍拂彩霓曹司今在殿東西賡歌太液翻黃鵠
從獵陳倉獲碧雞曉飲豈知金掌迥夜吟應訝玉繩低
鈞天雖許人間聽閶闔門多夢自迷

酬令狐郎中見寄

望郎臨古郡佳句灑丹青應自丘遲宅仍過柳惲汀封

來江渺渺信去雨冥冥句曲間仙訣臨川得佛經朝吟
措客枕夜讀漱僧瓶不見銜蘆鴈空流腐草螢土宜悲
坎井天怒識雷霆象卉分疆近蛟涎浸岸腥補羸貪紫
桂負氣託青萍萬里懸離抱危於訟閣鈴

七月二十八日夜與王鄭二秀才聽雨後夢作

初夢龍宮寶焰然瑞霞明麗滿晴天旋成醉倚蓬萊樹
有箇仙人拍我肩少頃遠聞吹細管聞聲不見隔飛煙
逡巡又過瀟湘雨雨打湘靈五十絃瞥見馮夷殊悵望

鮫綃休賣海為田亦逢毛女無慘極龍伯薺將華岳蓮
恍惚無倪明又暗低迷不已斷還連覺來正是平階雨
獨背寒燈枕手眠

寄令狐郎中

嵩雲秦樹久離居雙鯉迢迢一紙書休問梁園舊賓客
茂陵秋雨病相如

漫成三首

不妨何范盡詩家未解當年重物華遠把龍山千里雪

將來擬並洛陽花

沈約憐何遜延年毀謝莊清新俱有得名譽底相傷
霧夕詠芙蓉何郎得意初此時誰最賞沈范兩尚書

無題

一云
陽城

白道縈迴入暮霞斑駁嘶斷七香車春風自共何人笑
枉破陽城十萬家

槿花二首

燕體傷風力難香積露文殷鮮一相雜啼笑兩難分月

金史四
卷之三
卷上

裏寧無姊雲中亦有君三清與仙島何事亦離羣
珠館薰然以玉房梳掃餘燒蘭纔作燭褰錦不成書本
以亭亭遠翻嫌脉脉疎迴頭問殘照殘照更空虛

哭劉蕢

上帝深宮閉九闈巫咸不下問銜冤廣陵別後春濤隔
湓浦書來秋雨翻只有安仁能作誄何曾宋玉解招魂
平生風義兼師友不敢同君哭寢門

杜司勳

高樓風雨感斯文
短翼差池不及羣
刻意傷春復傷別
人間唯有杜司勳

荆門西下

一夕南風一葉危
荆雲迴望夏雲時
人生豈得輕離別
天意何曾忌嶮巖
骨肉書題安絕徼
蕙蘭蹊徑失佳期
洞庭湖濶蛟龍惡
却羨楊朱泣路岐

碧瓦

碧瓦銜珠樹紅輪
結綺寮無雙漢殿
鬢第一楚宮腰霧

唾香難盡珠啼冷易銷歌從雍門學酒是蜀城燒柳暗
將翻巷荷欹正抱橋鈿轆開道入金管隔隣調夢到飛
魂急書成即席遙河流衝柱轉海沫近槎飄吳市蟭螟
甲巳實翡翠翹他時未知意重疊贈嬌饒

蝶

葉葉復翻翻斜橋對側門蘆花唯有白柳絮可能溫西
子尋遺殿昭君覓故村年年芳物盡來別敗蘭蓀

蠅蝶雞麝鸞鳳等成篇

韓蝶翻羅幕曹蠅拂綺窓
閭雞迴玉勒融麝暖金缸
玊明書閣琉璃水酒缸
畫樓多有主鸞鳳各雙雙

韓翃舍人即事

萱草含丹粉荷花抱綠房
鳥應悲蜀帝蟬是怨齊王
通內藏珠府應官解玉坊
橋南荀令過十里送衣香

公子

一盞新羅酒凌晨恐易銷
歸應衝鼓半去不待笙調
歌好唯愁和香穠豈惜飄
春塲鋪艾帳下馬雉媒嬌

子初全溪作

全溪不可到况復盡餘醅
漢苑生春水昆池換劫灰
戰蒲知鴈唼皺月覺魚來
清興恭聞命言詩未敢迴

楊本勝說於長安見小男阿衮

聞君來日下見我最嬌兒
漸大啼應數長貧學恐遲
寄人龍種瘦失母鳳雛癡
語罷休邊角青燈兩鬢絲

西溪

悵望西溪水潺湲奈爾何不驚
春物少只覺夕陽多色

染妖韶柳光會窈窕蘿人間從到海天上莫為河鳳女
彈璫瑟龍孫撼玉珂京華他夜夢好好寄雲波

柳下暗記

無奈巴南柳千條傍吹臺更將黃映白擬作杏花媒

妓席

樂府聞桃葉人前道得無勸君書小字慎莫喚官奴

少年

外戚平羌第一功生年二十有重封直登宣室螭頭上

金匱要略卷之八
卷上

橫過甘泉豹尾中別館覺來雲雨夢後門歸去蕙蘭叢
灞陵夜獵隨田實不識寒郊自轉蓬

無題

近知名阿侯住處小江流腰細不勝舞眉長唯是愁黃
金堪作屋何不作重樓

玄微先生

仙翁無定數時入一壺藏夜夜桂露濕村村桃水香醉
中拋浩劫宿處起神光藥裏丹山鳳棋函白石郎美河

移砥柱吞日倚扶桑
龍竹栽輕策鮫絲熨下裳
樹栽嗤漢帝橋板笑秦皇
徑欲隨關令龍沙萬里強

藥轉

鬱金堂北畫樓東
換骨神方上藥通
露氣暗連青桂苑
風聲偏獵紫蘭叢
長籌未必輸孫皓
香棗何勞問石崇
憶事懷人兼得句
翠衾歸卧繡簾中

岳陽樓

欲為平生一散愁
洞庭湖上岳陽樓
可憐萬里堪乘興

枉是蛟龍解覆舟

寄成都高苗二從事

家近紅葉曲水濱
全家羅襪起秋塵
莫將越客千絲網
網得西施別贈人

岳陽樓

漢水方城帶百蠻
四隣誰道亂周班
如何一夢高唐雨
自此無心入武關

越燕二首

上國社方見此鄉秋不歸為矜皇后舞猶著羽人衣拂
水斜文亂銜花片影微盧家文杏好試近莫愁飛

將泥紅蓼岸得草綠楊村命侶添新意安巢復舊痕去

應逢阿母

樂府詩東飛伯勞西飛
燕黃姑阿母長相見

來莫害皇孫記取丹

山鳳今為百鳥尊

杜工部蜀中離席

人生何處不離羣世路干戈惜暫分雪嶺未歸天外使
松州猶駐殿前軍座中醉客延醒客江上晴雲雜雨雲

金日石台言
卷上
美酒成都堪送老當壚仍是卓文君

隋宮

紫泉宮殿鎖煙霞欲取蕪城作帝家玉璽不緣歸日角
錦帆應是到天涯於今腐草無螢火終古垂楊有暮鴉
地下若逢陳後主豈宜重問後庭花

二月二日

二月二日江上行東風日暖聞吹笙花鬢柳眼各無賴
紫蝶黃蜂俱有情萬里憶歸元亮井三年從事亞夫營

新灘莫悟遊人意更作風簷雨夜聲

籌筆驛

魚鳥猶疑畏簡書風雲長為護儲胥徒令上將揮神筆
終見降王走傳車管樂有才真不忝關張無命欲何如
他年錦里經祠廟梁父吟成恨有餘

屏風

六曲連環接翠帷高樓半夜酒醒時掩燈遮霧密如此
雨落月明俱不知

春日

欲入盧家白玉堂
新春催破舞衣裳
蝶銜花蕊蜂銜粉
共助青樓一日忙

武侯廟古栢

蜀相階前栢龍蛇
捧闕宮陰成外江
畔老向惠陵東
大樹思馮異
甘棠憶召公
葉彫湘燕雨
枝折海鵬風
玉壘經綸遠
金刀歷數終
誰將出師表
一為問昭融

風

撩釵盤孔雀惱帶拂鴛鴦羅薦誰教近齋時鎖洞房

即日

一歲林花即日休江間亭下悵淹留重吟細把真無奈
已落猶開未放愁山色正來銜小苑春陰只欲傍高樓
金鞍忽散銀壺滴更醉誰家白玉鈎

九成宮

十二層城闈苑西平時避暑拂虹霓雲隨夏后雙龍尾
風逐周王八馬蹄吳岳曉光連翠嶽甘泉晚景上丹梯

荔枝盧橘沾恩幸
鸞鵲天書濕紫泥

少將

族亞齊安陸
風高漢武威
煙波別墅醉
花月後門歸
青海間傳箭
天山報合圍
一朝攜劍起
上馬即如飛

詠史

歷覽前賢國與家
成由勤儉破由奢
何須琥珀方為枕
豈得真珠始是車
運去不逢青海馬
力窮難拔蜀山蛇
幾人曾預南薰曲
終古蒼梧哭翠華

贈白道者

十二樓前再拜辭
靈風正滿碧桃枝
壺中若是有天地
又向壺中傷別離

無題二首

昨夜星辰昨夜風
畫樓西畔桂堂東
身無彩鳳雙飛翼
心有靈犀一點通
隔座送鉤春酒暖
分曹射覆蠟燈紅
嗟余聽鼓應官去
走馬蘭臺類斷蓬

聞道閭門萼綠華
昔年相望抵天涯
豈知一夜秦樓客

偷看吳王苑內花

漢宮詞

青雀西飛竟未迴
君王長在集靈臺
侍臣最有相如渴
不賜金莖露一盃

無題四首

來是空言去絕蹤
月斜樓上五更鐘
夢為遠別啼難喚
書被催成墨未濃
蠟照半籠金翡翠
麝熏微度繡芙蓉
劉郎已恨蓬山遠
更隔蓬山一萬重

颯颯東風細雨來芙蓉塘外有輕雷
金蟾齧鎖燒香入
玉虎牽絲汲井迴賈氏窺簾韓掾少
宓妃留枕魏王才
春心莫共花爭發一寸相思一寸灰

含情春晚晚暫見夜闌干樓響將登怯
簾烘欲過難多
羞釵上燕真愧鏡中鸞歸去橫塘晚
葦星送寶鞍

何處哀箏隨急管櫻花永巷垂楊岸
東家老女嫁不售
白日當天三月半溧陽公主年十四
清明暖後同牆看
歸來展轉到五更梁間燕子聞長歎

赴職梓潼留別畏之員外同年

佳兆聯翩遇鳳凰，文羽帳紫金牀。
桂花香處同高第，柿葉翻時獨悼亡。
烏鵲失棲長不定，鴛鴦何事自相將。
京華庸蜀三千里，送到咸陽見夕陽。

桂林路中作

地暖無秋色，江晴有暮暉。
空餘蟬嘒嘒，猶向客依依。
村小犬相護，沙平僧獨歸。
欲成西北望，又見鷓鴣飛。

無題

照梁初有情出水舊知名
裙衩芙蓉小釵苒翡翠輕
錦長書鄭重眉細恨分明
莫近彈棋局中心最不平

蝶三首

初來小苑中稍與瑣闌通
遠恐芳塵斷輕憂豔雪融
只知防皓露不覺逆尖風
迴首雙飛燕乘時入綺籠

長眉畫了繡簾開
碧玉行收白玉臺
為問翠釵釵上鳳
不知香頸為誰迴

壽陽公主嫁時粧
八字宮眉捧額黃
見我佯羞頻照影

不知身屬冶遊郎

無題二首

八歲偷照鏡長眉已能畫十歲去踏青芙蓉作裙衩十
二學彈箏銀甲不曾卸十四藏六親懸知猶未嫁十五
泣春風背面鞦韆下

幽人不倦賞秋暑貴招邀竹碧轉悵望池清尤寂寥露
花終裏濕風蝶強嬌饒此地如攜手兼君不自聊

王十二兄與畏之員外相訪見招小飲時予以悼

亡日近不去因寄

謝傳門庭舊未行今朝歌管屬檀郎更無人處簾垂地
欲拂塵時簾竟牀嵇氏幼男猶可憫左家嬌女豈能忘
愁霖腹疾俱難遣萬里西風夜正長

隋宮

一云
隋堤

乘興南遊不戒嚴九重誰省諫書函春風舉國裁宮錦
半作障泥半作帆

落花

高閣客竟去小園花亂飛參差連曲陌迢遞送斜暉腸
斷未忍掃眼穿仍欲稀芳心向春盡所得是沾衣

月

池上與橋邊難忘復可憐簾開最明夜簾卷已涼天流
處水花急吐時雲葉鮮姮娥無粉黛只是逞嬋娟

贈宗魯筇竹杖

大夏資輕策全溪贈所思靜憐穿樹遠滑想過苔遲鶴
怨朝還望僧閒暮有期風流真底事常欲傍清羸

垂柳

娉婷小苑中
婀娜曲池東
朝佩皆垂地
仙衣盡帶風
七賢寧占竹
三品且饒松
腸斷靈和殿
先皇玉座空

曲池

日下繁香不自持
月中流豔與誰期
迎憂急鼓疎鐘斷
分隔休燈滅燭時
張蓋欲判江滌滌
迴頭更望柳絲絲
從來此地黃昏散
未信河梁是別離

代應二首

溝水分流西復東
九秋霜月五更風
離鸞別鳳今何在
十二玉樓空復空

昨夜雙鈎敗今朝
百草輸關西狂小吏
唯喝遶牀盧

席上作

予為桂州從事
故府鄭公出家妓
令賦高唐詩

澹雲輕雨拂高唐
玉殿秋來夜正長
料得也應憐宋玉
一生唯事楚襄王

訪隱者不過成二絕

秋水悠悠浸野扉
夢中來數覺來稀
玄蟬去盡葉黃落

一樹冬青人未歸

城郭休過識者稀
哀猿啼處有柴扉
滄江白石漁樵路
日暮歸來雨滿衣

破鏡

玉匣清光不復持
菱花散亂月輪虧
秦臺一照山雞後
便是孤鷺罷舞時

無題

紫府仙人號寶鐙
雲漿未飲結成冰
如何雪月交光夜

更在瑤臺十二層

贈庾十二朱版

時庾在翰林
朱書版也

固漆投膠不可開
贈君珍重抵瓊瑰
君王曉坐金鑾殿
只待相如草詔來

李花

李徑獨來數
愁情相與懸
自明無月夜
強笑欲風天
減粉與園籜
分香沾渚蓮
徐妃久已嫁
猶自玉為鈿

柳

曾逐東風拂舞筵，樂遊春苑斷腸天。
如何肯到清秋日，已帶斜陽又帶蟬。

三月十日流盃亭

身屬中軍少得歸，木蘭花盡失春期。
偷隨柳絮到城外，行過水西聞子規。

過招國李家南園二首

潘岳無妻客為愁，新人來坐舊妝樓。
春風猶自疑睽句，雪絮相和飛不休。

長亭歲盡雪如波，此去秦關路幾多。
唯有夢中相近分，
卧來無睡欲如何。

留贈畏之三首

時將赴職梓潼
遇韓朝迴作

清時無事奏明光，不遣當關報早霜。
中禁詞臣尋引領，
左川歸客自迴腸。
郎君下筆驚鸚鵡，
侍女吹笙弄鳳凰。
空寄大羅天上事，
衆仙同日詠霓裳。

待得郎來月已低，寒暄不道醉如泥。
五更又欲向何處，
騎馬出門烏夜啼。

戶外重陰黯不開
含羞迎夜復臨臺
滿湘浪上有煙景
安得好風吹汝來

為有

為有雲屏無限嬌
鳳城寒盡怕春宵
無端嫁得金龜塔
辜負香衾事早朝

無題

相見時難別亦難
東風無力百花殘
春蠶到死絲方盡
蠟炬成灰淚始乾
曉鏡但愁雲鬢改
夜吟應覺月光寒

蓬山此去無多路青鳥殷勤為探看

碧城三首

碧城十二曲闌干犀辟塵埃玉辟寒閨苑有書多附鶴
女牀無樹不棲鸞星沉海底當窻見雨過河源隔座看
若是曉珠明又定一生常對水精盤

對影聞聲已可憐玉池荷葉正田田不逢蕭史休迴首
莫見洪崖又拍肩紫鳳放嬌銜楚佩赤鱗狂舞撥湘絃
鄂君悵望舟中夜繡被焚香獨自眠

七夕來時先有期洞房簾箔至今垂
玉輪顧兔初生魄
鐵網珊瑚未有枝
檢與神方教駐景
收將鳳紙寫相思
武皇內傳分明在
莫道人間摠不知

對雪二首

時欲
之東

寒氣先侵玉女扉
清光旋透省郎闈
梅花大庾嶺頭發
柳絮章臺街裏飛
欲舞定隨曹植馬
有情應濕謝莊衣
龍山萬里無多遠
留待行人二月歸

旋撲珠簾過粉牆
輕於柳絮重於霜
已隨江令誇瓊樹

又入盧家妬玉堂侵夜可能爭桂魄
忍寒應欲試梅粧
關河凍合東西路腸斷班驩送陸郎

蜂

少苑葦池爛漫通後門前檻思無窮
宓妃腰細纔勝露
趙后身輕欲倚風紅壁寂寥崖蜜盡
碧簾迢迢霧巢空
青陵粉蝶休離恨長定相逢二月中

公子

外戚封侯自有恩平明通籍九華門
金唐公主年應小

二十君王未許婚

賦得雞

稻粱猶足活諸雛
妬敵專場好自娛
可要五更驚穩夢
不辭風雪為陽烏

明神

明神司過豈令寃
暗室由來有禍門
莫為無人欺一物
他時猶慮石能言

辛未七夕

金史四庫全書
卷上
恐是仙家好別離
故教迢遞作佳期
由來碧落銀河畔
可要金風玉露時
清漏漸移相望久
微雲未接過來遲
豈能無意酬烏鵲
唯與蛛蜘蛛乞巧絲

壬申七夕

已駕七香車
心心待曉霞
風輕唯響珮
日薄不凋花
桂嫩傳香遠
榆高送影斜
成都過卜肆
曾妬識靈槎

壬申閏秋題贈烏鵲

繞樹無依月
正高鄴城新
淚濺雲袍幾年始
得逢秋閏

兩度填河莫告勞

端居

遠書歸夢兩悠悠
只有空牀敵素秋
階下青苔與紅樹
雨中寥落月中愁

夜半

三更三點萬家眠
露欲為霜月墮煙
關鼠上牀蝙蝠出
玉琴時動倚窓絃

玉山

玉山高與閨風齊，玉水清流不貯泥。
何處更求迴日馭，此中兼有上天梯。
珠容百斛龍休睡，桐拂千尋鳳要棲。
聞道神仙有才子，赤簫吹罷好相攜。

張惡子廟

下馬捧椒漿，迎神白玉堂。
如何鐵如意，獨自與姚萇。

雨

撼撼度瓜園，依依傍竹軒。
秋池不自冷，風葉共成喧。
窻迥有時見，簷高相續翻。
侵宵送書鴈，應為稻梁恩。

菊

暗暗淡淡紫融融冶冶黃陶令籬邊色羅含宅裏香幾
時禁重露實是怯殘陽願泛金鸚鵡升君白玉堂

牡丹

錦幃初卷衛夫人

典畧云夫子見南
子在錦幃之中

繡被猶堆越鄂君

垂手亂翻雕玉珮招腰爭舞鬱金裙石家蠟燭何曾翦
荀令香爐可待熏我是夢中傳彩筆欲書花葉寄朝雲

北樓

欽定四庫全書

春物豈相干人生只強歡花猶曾歛夕酒竟不知寒異
域東風濕中革上象寬此樓堪北望輕命倚危闌

擬沈下賢

千二百輕鷺春衫瘦著寬倚風行稍急含雪語應寒帶
火遺金斗兼珠碎玉盤河陽看花過曾不問潘安

蝶

飛來繡戶陰穿過畫樓深重傳秦臺粉輕塗漢殿金相
兼唯柳絮所得是花心可要凌孤客邀為子夜吟

飲席代官妓贈兩從事

新人橋上著春衫，舊主江邊側帽簷。

隋獨孤信舉止風流，曾風吹帽簷側。

觀者塞路

願得化為紅綬帶，許教雙鳳一時銜。

代魏宮私贈

黃初三年已隔存沒，追代其意，何必同時亦廣子夜鬼歌之流。

來時西館阻佳期，去後漳河隔夢思。
知有宓妃無限意，春松秋菊可同時。

代元城吳令暗為答

背闕歸藩路欲分，水邊風日半西曛。
荆王枕上元無夢，

莫枉陽臺一片雲

牡丹

壓徑復緣溝當窻又映樓終銷一國破不啻萬金求鸞
鳳戲三島神仙居十洲應憐萱草淡却得號忘憂

百果嘲櫻桃

珠寶雖先熟瓊葶縱早開流鶯猶故在爭得諱會來

櫻桃答

衆果莫相誚天生名品高何因古樂府唯有鄭櫻桃

曉坐

一云
後閣

後閣罷朝眠前墀思黯然梅應未假雪柳自不勝煙淚
續淺深綆腸危高下絃紅顏無定所得失在當年

詠史

北湖南埭水漫漫一片降旗百尺竿三百年間同曉夢
鍾山何處有龍盤

一片

一片非煙隔九枝蓬巖仙仗儼雲旗天泉水暖龍吟細

露晚春多鳳舞遲
榆莢散來星斗轉
桂花尋去月輪移
人間桑海朝朝變
莫遣佳期更後期

日射

日射紗窓風撼扉
香羅拭手春事違
迴廊四合掩寂寞
碧鸚鵡對紅薔薇

題鷺

眠沙卧水自成羣
曲岸殘陽極浦雲
那解將心憐孔雀
羈雌長共故雄分

華清宮

朝元閣迥羽衣新
首按昭陽第一人
當日不來高處舞
可能天下有胡塵

梓潼望長卿山至巴西復懷譙秀

梓潼不見馬相如
更欲南行問酒壚
行到巴西覓譙秀
巴西唯是有寒蕪

齊宮詞

永壽兵來夜不扃
金蓮無復印中庭
梁臺歌管三更罷

猶自風搖九子鈴

十一月中旬至扶風界見梅花

匝路亭亭豔非時
稊稊香素娥唯與月
青女不饒霜贈
遠虛盈手傷離適
斷腸為誰成
早秀不待作年芳

青陵臺

青陵臺畔日光斜
萬古貞魂倚暮霞
莫訝韓憑為蛺蝶
等閒飛上別枝花

東還

自有仙才自不知十年長夢採華芝
秋風動地黃雲暮
歸去嵩陽尋舊師

酬崔八早梅有贈兼示之作

知訪寒梅過野塘
久留金勒為迴腸
謝郎衣袖初翻雪
荀令熏爐更換香
何處拂胸資蝶粉
幾時塗額藉蜂黃
維摩一室雖多病
亦要天花作道場

春風

春風雖自好春物太昌昌
若教春有意唯遣一枝芳
我

意殊春意先春已斷腸

蜀桐

玉壘高桐拂玉繩上舍非霧下舍水枉教紫鳳無棲處
斷作秋琴彈壞陵

漢宮

通靈夜醮達清晨承露盤晞甲帳春王母西歸方朔去
更須重見李夫人

判春

一桃復一李井上占年芳笑處如臨鏡窺時不隱牆敢
言西子短誰覺宓妃長珠玉終相類同名作夜光

促漏

促漏遙鐘動靜聞報章重疊香難分舞鸞鏡匣收殘黛
睡鴨香爐換夕熏歸去定知還向月夢來何處更為雲
南塘漸暖蒲堪結兩兩鴛鴦護水紋

江東

驚魚撥刺燕翩翾獨自江東上釣船今日春光太漂蕩

謝家輕絮沈郎錢

讀任彦昇碑

任昉當年有美名
可憐才調最縱橫
梁臺初建應惆悵
不得蕭公作騎兵

荷花

都無色可並不奈此香
何瑶席乘涼設金羈
落晚過迴衾燈照綺渡
襪水沾羅預想前秋
別離居夢權歌

五松驛

獨下長亭念過秦五松不見見輿薪只應既斬斯高後
尋被樵人用斧斤

灞岸

山東今歲點行頻幾處冤魂哭虜塵灞水橋邊倚華表
平時二月有東巡

送臻師二首

昔去靈山非拂席今來滄海欲求珠楞伽頂上清涼地
善眼仙人憶我無

苦海迷途去未因東方過此幾微塵何當百億蓮花上
一一蓮花見佛身

七夕

鸞扇斜分鳳幄開星橋橫過鵲飛迴爭將世上無期別
換得年年一度來

謝先輩防記念拙詩甚多異日偶有此寄

曉用雲添句寒將雪命篇良辰多自感作者豈皆然熟
寢初同鶴舍嘶欲並蟬題時長不展得處定應偏南浦

無窮樹西樓不住煙改成人寂寂寄與路綿綿星勢寒
垂地河聲曉上天夫君自有憾聊借此中傳

馬嵬二首

冀馬燕犀動地來自埋紅粉自成灰君王若道能傾國
王輦何由過馬嵬

海外徒聞更九州

鄒衍云九州之外復有九州

他生未卜此生休空聞

虎旅鳴宵柝無復難人報曉籌此日六軍同駐馬當時
七夕笑牽牛如何四紀為天子不及盧家有莫愁

可歎

幸會東城宴未迴
年華憂共水相催
梁家宅裏秦官入
趙后樓中赤鳳來
水簾且眠金鏤枕
瓊筵不醉玉交盃
宓妃愁坐芝田館
用盡陳王八斗才

望喜驛別嘉陵江水二絕

嘉陵江水此東流
望喜樓中憶閬州
若到閬中還赴海
閬州應更有高樓

千里嘉陵江水色
含煙帶月碧於藍
今朝相送東流後

猶自驅車更向南

別薛巖賓

曙爽行將拂晨清坐欲凌別離真不那風物正相仍漫
水任誰照衰花淺自矜還將兩袖淚同向一窓燈桂樹
乖真隱芸香是小懲清規無以況且用玉壺冰

富平少侯

七國三邊未到憂十三身襲富平侯不收金彈拋林外
却惜銀牀在井頭綵樹轉燈珠錯落繡檀迴枕玉雕鏤

當關不報侵晨客
新得佳人字莫愁

腸

有懷非惜恨不奈寸腸何
即席迴彌久前時斷固多
熟應翻急燒冷欲徹微波
隔樹淅淅雨通池點點荷
倦程山向背望國闕嵯峨
故念飛書及新歡借夢過
染筠休伴淚繞雪莫追歌
擬問陽臺事年深楚語訛

贈宇文中丞

欲構中天正急材
自緣煙水戀平臺
人間只有嵇延祖

最望山公啟事來

公盛歎亡友張君故有此句

曉起

擬盃當曉起呵鏡可微寒
隔箔山櫻熟褰帷桂燭殘
書長為報晚夢好更尋難
影響輪雙蝶偏過舊晚蘭

閨情

紅露花房白蜜脾
黃蜂紫蝶兩參差
春窻一覺風流夢
却是同袍不得知

月夕

草下陰蟲葉上霜朱欄迢迢壓湖光
兔寒蟾冷桂花白
此夜姮娥應斷腸

杏花

上國昔相值亭亭如欲言異鄉今暫賞
脉脉豈無息援
少風多力牆高月有痕為會無限意
遂對不勝繁仙子
玉京路主人金谷園幾時辭碧落
誰伴過黃昏鏡拂鉛
華膩爐藏桂燼温終應催竹葉
先擬詠桃根莫學啼成
血從教夢寄魂吳王採香逕
失路入煙村

燈

皎潔終無倦煎熬亦自求
花時隨酒遠雨夜背窓休
冷暗黃茅驛暄明紫桂樓
錦囊名畫掩玉局敗棋收
何處無佳夢誰人不隱憂
影隨簾押轉光信簾文流
客自勝潘岳儂今定莫愁
固應留半焰迴照下幃羞

清河

舟小迴仍數樓危凭亦頻
燕來從及社蝶舞太侵晨
絳雪除煩後霜梅取味新
年華無一事只是自傷春

襪

嘗聞宓妃襪渡水欲生塵好借嫦娥著清秋蹋月輪

追代盧家人嘲堂內

道却橫波字人前莫謾羞只應同楚水長短入淮流

代應

本來銀漢是紅牆隔得盧家白玉堂誰與王昌報消息
盡知三十六鷺鴦

離亭賦得折楊柳二首

暫憑樽酒送無悽莫損愁眉與細腰人世死前唯有別
春風爭擬惜長條

會煙惹霧每依依萬緒千條拂落暉為報行人休盡折
半留相送半迎歸

寄永道士

共上雲山獨下遲陽臺白道細如絲君今併倚三珠樹
不記人間落葉時

華州周大夫宴席

郡齋何用酒如泉
飲德先時已醉眠
若共門人推禮分
戴崇爭得及彭宣

荆山

壓河連華勢孱顏
鳥沒雲歸一望間
楊僕移關三百里
可能全是為荆山

次陝州先寄源從事

離思羈愁日欲晡
東周西雍此分途
迴鑿佛寺高多少
望盡黃河一曲無

過鄭廣文舊居

宋玉平生恨有餘，遠循三楚弔三閭。
可憐留著臨江宅，異代應教庾信居。

東下三句苦於風土馬上戲作

路遠函關東復東，身騎征馬逐驚蓬。
天池遼澗誰相待，日日虛乘九萬風。

莫愁

雪中梅下與誰期，梅雪相兼一萬枝。
若是石城無艇子，

莫愁還自有愁時

夢令狐學士

山驛荒涼白竹扉
殘燈向曉夢清暉
右銀臺路雪三尺
鳳詔裁成當直歸

涉洛川

通谷陽林不見人
我來遺恨古時春
宓妃漫結無窮恨

不為君王殺灌均

灌均陳王之典義
諧諸王於文帝者

有感

中路因循我所長
古來才命兩相妨
勸君莫強安蛇足
一盞芳醪不得嘗

宮妓

珠箔輕明拂玉墀
披香新殿闔腰支
不須看盡魚龍戲
終遣君王怒僊師

宮詞

君恩如水向東流
得寵憂移失寵愁
莫向樽前奏花落
涼風只在殿西頭

代贈二首

樓上黃昏欲望休
玉梯橫絕月中鉤
芭蕉不展丁香結
同向春風各自愁

東南日出照高樓
樓上離人唱石州
搥把春山掃眉黛
不知供得幾多愁

楚吟

山上離宮宮上樓
樓前官畔暮江流
楚天長短黃昏雨
宋玉無愁亦自愁

瑶池

瑶池阿母綺窓開
黃竹歌聲動地哀
八駿日行三萬里
穆王何事不重來


柳

為有橋邊拂面香
何曾自敢占流光
後庭玉樹承恩澤
不信年華有斷腸

寄在朝鄭曹獨孤李四同年

昔歲陪遊舊跡多
風光今日兩蹉跎
不因醉本蘭亭在

兼忘當年舊永和



李義山詩集卷上

欽定四庫全書

集部

李義山詩集卷中

詳校官監察御史_臣查瑩

檢討_臣何思鈞覆勘

總校官檢討_臣何思鈞

校對官編修_臣戴聯奎

謄錄監生_臣孫起楠

欽定四庫全書

李義山詩集卷中

南朝

唐
李商隱 撰

地險悠悠天險長
金陵王氣應瑤光
休誇此地分天下
只得徐妃半面粧

題漢祖廟

乘運應須定
八荒男兒女
在戀池隍
君王自起新豐後

項羽何曾在故鄉

卷中

韓冬郎卽席為詩相送一座盡驚他日余方追吟
連宵侍坐徘徊久之句有老成之風因成二絕
寄酬兼呈畏之員外

十歲裁詩走馬成
冷灰殘燭動離情
桐花萬里丹山路
雛鳳清於老鳳聲

劍棧風檣各苦辛
別時冰雪到時春
為憑何遜休聯句
瘦盡東陽姓沈人

沈東陽約嘗謂何遜曰吾每讀卿詩
一日三復終未能到余雖無東陽之

才而有束
陽之瘦矣

評事翁寄賜粥走筆為答

粥香餽白杏花天
省對流鶯坐綺筵
今日寄來春已老
鳳樓迢迢憶鞦韆

東阿王

國事分明屬灌均
西陵魂斷夜來人
君王不得為天子
半為當時賦洛神

聖女祠

松篁臺殿蕙香悵龍護瑤窓鳳掩扉無質易迷三里霧
不寒長著五銖衣人間定有崔羅什天上應無劉武威
寄問釵頭雙白燕每朝珠館幾時歸

獨居有懷

麝重愁風逼羅疎畏月侵怨魂迷恐斷嬌喘細疑沈數
急芙蓉帶頰抽翡翠簪柔情終不遠遙妬已先深浦冷
鴛鴦去園空蛺蝶尋蠟花長遞淚箏柱鎮移心覓使嵩
雲暮迴頭灞岸陰只聞涼葉院露井近寒砧

過景陵

武皇精魄久仙昇
帳殿淒涼煙霧凝
俱是蒼生留不得
鼎湖何異魏西陵

臨發崇讓宅紫薇

一樹穠姿獨看來
秋庭暮雨類輕埃
不先搖落應為有
已欲別離休更開
桃綬含情依露井
柳綿相憶隔章臺
天涯地角同榮謝
豈要移根上苑栽

及第東歸次灞上却寄同年

全宋文卷之三
卷中
芳桂當年各一枝，行期未分壓春期。江魚胡鴈長相憶，
秦樹嵩雲自不知。下苑經過勞想像，東門送餞又差池。
灞陵柳色無離恨，莫枉長條贈所思。

野菊

苦竹園南椒塢邊，微香冉冉淚涓涓。已悲節物同寒鴈，
忍委芳心與暮蟬。細路獨來當此夕，清樽相伴省他年。
紫雲新苑移花處，不取霜栽近御筵。

板橋曉別

迴望高城落曉河長亭窻戶壓微波水仙欲上鯉魚去
一夜芙蓉紅淚多

過伊僕射舊宅

朱邸方酬力戰功華筵俄歎逝波窮迴廊簷斷燕飛去
小閣塵凝人語空幽淚欲乾殘菊露餘香猶入敗荷風
何能更涉龍江去獨立寒流弔楚宮

關門柳

永定河邊一行柳依依長發故年春東來西去人情薄

金史四庫全書
卷十
不為清陰減路塵

酬別令狐補闕

惜別夏仍半迴途秋已期那修直諫草更賦贈行詩錦
段知無報青萍肯見疑人生有通塞公等繫安危警露
鶴辭侶吸風蟬抱枝彈冠如不問又到掃門時

銀河吹笙

悵望銀河吹玉笙樓寒院冷接平明重衾幽夢他年斷
別樹羈雌昨夜驚月榭故香因雨發風簾殘燭隔霜清

不須浪作緱山意，湘瑟秦簫自有情。

與同年李定言曲水間話戲作

海燕參差溝水流，同君身世屬離憂。
相攜花下非秦贅，對泣春天類楚囚。
碧草暗侵穿苑路，珠簾不捲枕江樓。
莫驚五勝埋香骨，地下傷春亦白頭。

彭城公薨後贈杜二十七勝李十七潘二君並與
愚同出故尚書安平公門下

梁山兗水約從公，兩地差池一旦空。
謝墅庾村相弔後，

自今岐路更西東

聞歌

斂笑凝眸意欲歌
高雲不動碧嵯峨
銅臺罷望歸何處
玉輦忘還事幾多
青冢路邊南鴈盡
細腰宮裏北人過
此聲腸斷非今日
香炷燈光奈爾何

贈華陽宋真人兼寄清都劉先生

淪謫千年別帝宸
至今猶謝蓋珠人
但驚茅許同仙籍
不道劉盧是世親
玉檢賜書迷鳳篆
金華歸駕冷龍鱗

不因杖屨逢周史徐甲何曾有此身

楚宮二首

十二峯頭落照微高唐宮暗坐迷歸朝雲暮雨長相接
猶自君王恨見稀

月姊曾逢下彩蟾傾城消息隔重簾已聞珮響知腰細
更辨絃聲覺指纖暮雨自歸山悄悄秋河不動夜厭厭
王昌且在墻東住未必金堂得免嫌

和友人戲贈

東望花樓會不同西來雙燕信休通
仙人掌冷三霄露玉女窻虛五夜風
翠袖自隨迴雪轉燭房尋類外庭空
殷勤莫使清香透牢合金魚鎖桂叢

迢遞青門有幾關柳梢樓角見南山
明珠可貫須為珮白璧堪裁且作環
子夜歌團扇掩新正未破剪刀閒
猿啼鶴怨終年事未抵薰爐一夕間

題二首後重有戲贈任秀才

一丈紅蒿擁翠筠羅窻不識繞街塵
峽中尋覓長逢雨

月裏依稀更有人
虛為錯刀留遠客
枉緣書札損文鱗
遙知小閣還斜照
羨殺烏龍臥錦茵

有感二首

乙卯年有感
丙辰年詩成

九服歸元化
三靈叶睿圖
如何本初輩
自取屈茆誅
有甚當車泣
因勞下殿趨
何成奏雲物
直是滅萑苻
符書密詞連
性命俱竟緣
尊漢相不早
辨胡雖鬼錄
分朝部軍鋒
照上都敢云
堪慟哭
未免怨洪爐

丹陛猶敷奏
彤庭歛戰爭
臨危對盧植

是晚獨召故相彭陽公入

始

悔用龐萌御仗叔前殿克徒劇背城蒼黃五色棒掩過
一陽生古有清君側今非乏老成素心雖未易此舉太
無名誰願銜冤目寧吞欲絕聲近聞開壽讌不廢用咸

英

重有感

玉帳牙旗得上游安危須共主分憂竇融表已來關右
陶侃軍宜次石頭豈有蛟龍愁失水更無鷹隼與高秋
晝號夜哭兼幽顯早晚星闕雪涕收

壽安公主出降

媯水聞真媛常山索銳師昔憂迷帝力今分送王姬事
等和強虜恩殊睦本枝四郊多壘在此禮恐無時

夕陽樓

在滎陽是所知今遂寧
蕭侍郎牧滎陽日作矣

花明柳暗繞天愁上盡重城更上樓欲問孤鴻向何處
不知身世自悠悠

春雨

帳卧新春白袷衣白門寥落意多違紅樓隔雨相望冷

珠箔飄燈獨自歸，遠路應悲春晚。晚殘宵猶得夢依稀，
玉璫絨札何由達。萬里雲羅一鴈飛。

中元作

絳節飄飄空國來，中元朝拜上清迴。羊權雖得金條脫，
溫嶠終虛玉鏡臺。曾省鷲眠聞雨過，不知迷路為花開。
有娥未抵瀛洲遠，青雀如何鳩鳥媒。

鴛鴦

雌去雄飛萬里天，雲羅滿眼淚潸然。不須長結風波願。

鎖向金籠始兩全

楚宮

湘波如淚色泫泫楚襦迷魂逐恨遙楓樹夜猿愁自斷
女蘿山鬼語相邀空歸腐敗猶難復更因腥臊豈易招
但使故鄉三戶在綵絲誰惜懼長蛟

妓席暗記送同年獨孤雲之武昌

疊嶂千重叫恨猿長江萬里洗離魂武昌若有山頭石
為拂蒼苔檢淚痕

宿晉昌亭聞鷺禽

羈縲鰥鰥夜景侵高窓不掩見鷺禽飛來曲渚煙方合
過盡南塘樹更深胡馬嘶和榆塞笛楚猿吟雜橘村砧
失羣掛木知何限遠隔天涯共此心

深宮

金殿銷香閉綺籠玉壺傳點咽銅龍狂飈不惜蘿陰薄
清露偏知桂葉濃斑竹嶺邊無限淚景陽宮裏及時鐘
豈知為雨為雲處只有高唐十二峰

明禪師院酬從兄見寄

貞吝嫌茲世會心馳本源人非四禪縛地絕一塵喧霜
露敬高木星河墮故園斯遊儻為勝九折幸迴軒

寄裴衡

別地蕭條極如何更獨來秋應為紅葉雨不厭青苔沈
約只能瘦潘仁豈是才離情堪底寄唯有冷於灰

即日

小苑試春衣高樓倚暮暉天桃唯是笑舞蝶不空飛赤

嶺久無耗鴻門猶合圍
幾家緣錦字含淚坐鴛機

淮陽路

荒村倚廢營投宿旅魂驚
斷鴈高仍急寒溪曉更清
昔年嘗聚盜此日頗分兵
猜貳誰先致三朝事始平

宗讓定東亭醉後泐然有作

曲岸風雷罷東亭霽日涼
新秋仍酒困幽興暫江鄉
搖落真何遽交親或未亡
一帆彭蠡月數鴈塞門霜
俗態雖多累仙標發近狂
聲名佳句在身世玉琴張
萬古山

空碧無人鬢免黃驂騶憂老大鷓鴣妬芬芳密竹沈虛
籟孤蓮泊晚香如何此幽勝淹卧劇清漳

晚晴

深居俯夾城春去夏猶清天意憐幽草人間重晚晴併
添高閣迥微注小窓明越鳥巢乾後歸飛體更輕

迎寄韓魯州瞻同年

積雨晚騷騷相思正鬱陶不知人萬里時有燕雙高冠

盜纏三輔

時興元賊起
三川兵出

莓苔滑百牢聖朝推衛索歸日

動仙曹

武夷山

只得流霞酒一杯空中簫鼓當時迴
武夷洞裏生毛竹
老盡曾孫更不來

一片

一片瓊英價動天
連城十二昔虛傳
良工巧費真為累
楮葉成來不直錢

寄成都高苗二從事

時三公從事
商隱座王府

紅蓮幕下紫梨新
命斷湘南病渴人
今日問君能寄否
二江風水接天津

鄭州獻從叔舍人

襄

蓬島煙霞閭苑鍾
三官牋奏附金龍
茅君奕世仙曹貴
許掾全家道氣濃
絳簡尚參黃紙案
丹爐猶用紫泥封
不知他日華陽洞
許上經樓第幾重

西南行却寄相送者

百里陰雲覆雪泥
行人只在雪雲西
明朝驚破還鄉夢

定是陳倉碧野雞

四皓廟

羽翼殊勲棄若遺
皇天有運我無時
廟前便接山門路
不長青松長紫芝

題白石蓮華寄楚公

白石蓮花誰所共
六時長捧佛前燈
空庭苔蘚饒霜露
時夢西山老病僧
大海龍宮無限地
諸天鴈塔幾多層
漫誇鷲子真羅漢
不會牛車是上乘

安定城樓

迢遞高城百尺樓，綠楊枝外盡汀洲。
賈生年少虛垂涕，王粲春來更遠遊。
永憶江湖歸白髮，欲迴天地入扁舟。
不知腐鼠成滋味，猜意鸚鵡竟未休。

隋宮守歲

消息東郊木帝迴，宮中行樂有新梅。
沈香甲煎為庭燎，玉液瓊蘇作壽盃。
遙望露盤疑是月，遠聞鼙鼓欲驚雷。
昭陽第一傾城客，不踏金蓮不肯來。

利州江潭作

感孕金輪所

神劍飛來不易銷
碧潭珍重駐蘭橈
自攜明月移燈疾
欲就行雲散錦遙
河伯軒窓通貝闕
水宮帷箔卷冰綃
他時燕脯無人寄
雨滿空城蕙葉彫

卽日

地寬樓已迥人更迥
於樓細意經春物
傷醒屬暮愁望
賒殊易斷恨久欲
難收大勢真無利
多情豈自由空園
葉樹發敗港擁花
流書去青楓驛鴻
歸杜若洲單樓應

分定辭疾索誰憂更替林鴉恨驚頻去不休

相思

相思樹上合歡枝紫鳳青鸞並羽儀腸斷秦臺吹管客
日西春盡到來遲

茂陵

漢家天馬出蒲梢首着榴花徧近郊內苑只知含鳳嘴
屬車無復插雞翹玉桃偷得憐方朔金屋修成貯阿嬌
誰料蘇卿老歸國茂陵松柏雨蕭蕭

鏡檻

鏡檻芙蓉入香臺翡翠過撥絃驚火鳳交扇拂天鷲隱
忍陽城笑喧傳郢市歌仙眉瓊作葉佛髻鈿為螺五里
無因霧三秋只見河月中供藥剌海上得綃多玉集胡
沙割犀留聖水磨斜門穿戲蝶小閣鎖飛蛾騎檐侵韉
卷車帷約慙釵傳書兩行鴈取酒一封駝橋迥涼風壓
溝橫夕照和待烏燕太子駐馬魏東阿想像鋪芳褥依
稀解醉羅散時簾隔露卧後幕生波梯穩從攀桂弓調

任射豈能拋斷夢聽鼓事朝珂

送鄭大台文南覲

黎辟灘聲五月寒南風無處附平安君懷一匹胡威絹
爭拭酬恩淚得乾

風

迥拂來鴻急斜催別燕高已寒休慘淡更遠尚呼號楚
色分西塞夷音接下牢歸舟天外有一為戒波濤

洞庭魚

洞庭魚可拾不假更垂罾
鬧若雨前蟻多於秋後蠅
豈思鱗作簞仍計腹為燈
浩蕩天池路翺翔欲化鵬

天涯

春日在天涯天涯日又斜
鶯啼如有淚為濕最高花

喜舍弟羲叟及第上禮部魏公

國以斯文重公仍內署來
風標森太華星象逼中台
朝滿遷鶯侶門多吐鳳才
寧同魯司寇唯鑄一顏回

哀箏

延頸全同鶴，柔腸素怯猿。
湘波無限淚，蜀魄有餘冤。
輕憶長無道，哀箏不出門。
何由問香炷，翠幕自黃昏。

自南山北歸經分水嶺

水急愁無地，山深故有雲。
那通極目望，又作斷腸分。
鄭驛來雖及，燕臺哭不聞。
猶餘遺意在，許刻鎮南勳。

舊頓

東人望幸久咨嗟，四海於今是一家。
猶鎖平時舊行殿，盡無宮戶有宮鴉。

代董秀才却扇

莫將畫扇出帷來
遮掩春山滯上才
若道團圓似明月
此中須放桂花開

有感

非關宋玉有微詞
却是襄王夢覺遲
自高唐賦成後
楚天雲雨盡堪疑

驪山有感

驪岫飛泉泛暖香
九龍呵護玉蓮房
平明每幸長生殿

不從金輿唯壽王

別智玄法師

雲鬢無端怨別離十年移易住山期
東西南北皆垂淚却是楊朱真本師

贈孫綺新及第

長樂遙聽上苑鐘綵衣稱慶桂香濃
陸機始擬誇文賦不覺雲間有士龍

代秘書贈弘文館諸校書

金剛已居合書
卷中
清切曹司近玉除比來秋興復何如崇文館裏丹霜後
無限紅梨憶校書

亂石

虎踞龍蹲縱復橫星光漸減雨痕生不須併礙東西路
哭殺厨頭阮步兵

日日

一云
春光

日日春光鬪日光山城斜路杏花香幾時心緒渾無事
得及遊絲百尺長

過楚宮

巫峽迢迢舊楚宮
至今雲雨暗丹楓
微生盡戀人間樂
只有襄王憶夢中

龍池

龍池賜酒敞雲屏
羯鼓聲高衆樂停
夜半宴歸宮漏永
薛王沈醉壽王醒

淚

永巷長年怨綺羅
離情終日思風波
湘江竹上痕無限

峴首碑前灑幾多人去紫臺秋入塞兵殘楚帳夜聞歌
朝來灞水橋邊問未抵青袍送玉珂

十字水期韋潘侍御同年不至時韋寓居水次故

郭汾寧宅

伊水濺濺相背流朱欄畫閣幾人遊漆燈夜照真無數
蠟炬晨炊竟未休顧我有懷同大夢期君不至更沈憂
西園碧樹今誰主與近高窓卧聽秋

流鶯

流鶯漂蕩復參差
渡陌臨流不自持
巧轉豈能無本意
良辰未必有佳期
風朝露夜陰晴裏
萬戶千門開閉時
曾苦傷春不思聽
鳳城何處有花枝

出關宿盤豆館對叢蘆有感

蘆葉梢梢夏景深
郵亭暫欲洒塵襟
昔年曾是江南客
此日初為關外心
思子臺邊風自急
玉娘湖上月應沈
清聲不遠行人去
一世荒城伴夜砧

和韓錄事送宮人入道

星使追還不自由，雙童捧上綠瓊輶。
九枝燈下朝金殿，三素雲中侍玉樓。
鳳女顛狂成久別，月娥孀獨好同遊。
當時若愛韓公子，埋骨成灰恨未休。

卽日

小鼎煎茶面曲池，白鬚道士竹間棋。
何人書破蒲葵扇，記著南塘移樹時。

聖女祠

杳靄逢仙跡，蒼茫滯客途。
何年歸碧落，此路向皇都。
消

息期青雀逢迎異紫姑腸迴楚國夢心斷漢宮巫從騎
裁寒竹行車蔭白榆星娥一去後月姊更來無寡鵠迷
蒼壑羈鳳怨翠梧唯應碧桃下方朔是狂夫

七月二十九日崇讓宅讌作

露如微霰下前池月過迴塘萬竹悲浮世本來多聚散
紅葉何事亦離披悠揚歸夢唯燈見蘗落生涯只酒知
豈到白頭長只爾嵩陽松雪有心期

贈從兄閔之

金定已居
卷中
帳望人間萬事違
私書幽夢約忘機
荻花村裏魚標在
石蘚庭中鹿跡微
幽徑定攜僧共入
寒塘好與月相依
城中獬犬憎蘭珮
莫損幽芳久不歸

吳宮

龍檻沈沈水殿清
禁門深掩斷人聲
吳王宴罷滿宮醉
日暮水漂花出城

常娥

雲母屏風燭影深
長河漸落曉星沈
常娥應悔偷靈藥

碧海青天夜夜心

殘花

殘花啼露莫留春
尖髮誰非怨別人
若但掩關勞獨夢
寶釵何日不生塵

天津西望

虜馬崩騰忽一狂
翠華無日到東方
天津西望腸真斷
滿眼秋波出苑牆

西亭

金定巳后 全書
卷中
此夜西亭月正圓
疎簾相伴宿風煙
梧桐莫更翻清露
孤鶴從來不得眠

憶住一師

無事經年別遠公
帝城鐘曉憶西峯
爐烟消盡寒燈晦
童子開門雪滿松

昨夜

不辭鷓鴣妬年芳
但惜流塵暗燭房
昨夜西池涼露滿
桂花吹斷月中香

海客

海客乘槎上紫氛
星娥罷織一相聞
只應不憚牽牛妬
聊用支機石贈君

初食笋呈座中

嫩箨香苞初出林
於陵論價重如金
皇都陸海應無數
忍翦凌雲一寸心

早起

風露澹清晨
簾間獨起人
鶯啼花又笑
畢竟是誰春

寄蜀客

君到臨邛問酒壚
近來還有長卿無
金徽却是無情物
不許文君憶故夫

行至金牛驛寄興元渤海尚書

樓上春雲水底天
五雲章色破巴牋
諸生箇箇王恭柳
從事人人庾杲蓮
六曲屏風江雨急
九枝燈檠夜珠圓
深慙走馬金牛路
驟和陳王白玉篇

深樹見一顆櫻桃尚在

高挑留晚實尋得小庭南
矮墮綠雲髻歌危紅玉簪
惜堪充鳳食痛已被鶯含
越鳥誇香荔齊名亦未甘

細雨

惟飄白玉堂簾卷碧牙牀
楚女當時意蕭蕭髮彩涼

歌舞

過雲歌響清迴雪舞腰輕
只要君流盼君傾國自傾

海上

石橋東望海連天徐福空來
不得仙直遣麻姑與搔背

可能留命待桑田

魏侯第東北樓堂
郢叔言別聊用書所見成篇

暗樓連夜閣不擬為黃昏
未必斷別淚何曾妨夢魂
疑穿花透迤漸近火溫曆
海底翻無水仙家却有村鎖香
金屈戌璫酒玉崑崙羽白風
交扇冰清月印盆
舊歡塵自積新歲電猶奔
霞綺空留段雲峯不帶根
念君千里舸江草漏燈痕

白雲夫舊居

平生誤識白雲夫，再到仙簷憶酒壚。
牆外萬株人絕迹，夕陽唯照欲棲烏。

同學彭道士參寥

莫羨仙家有上真，仙家暫謫亦千春。
月中桂樹高多少，試問西河斫樹人。

到秋

扇風漸瀝簟流離，萬里南雲滯所思。
守到清秋還寂寞，葉丹苔碧閉門時。

華師

孤鶴不睡雲無心
衲衣筇杖來西林
院門晝鎖迴廊靜
秋日當階柿葉陰

華嶽下題西王母廟

神仙有分豈關情
八馬虛追落日行
莫恨名姬中夜沒
君王猶自不長生

過華清內廐門

華清別館閉黃昏
碧草悠悠內廐門
自是明時不巡幸

至今青海有龍孫

樂遊原

萬樹鳴蟬隔斷虹
樂遊原上有西風
羲和自趁虞泉宿
不放斜陽更向東

贈荷花

世間花葉不相倫
花入金盆葉作塵
唯有綠荷紅菡萏
白卷舒開合任天真
此花此葉長相映
翠減紅衰愁殺人

丹丘

青女丁寧結夜霜
羲和辛苦送朝陽
丹丘萬里無消息
幾對梧桐憶鳳凰

房君珊瑚散

不見嫦娥影
清秋守月輪
月中閒杵白
桂子搗成塵

小桃園

竟日小桃園
休寒亦未暄
坐鶯當酒重
送客出牆繁
啼久豔粉薄
舞多香雪翻
猶憐未圓月
先出照黃昏

嘲櫻桃

朱實鳥含盡青樓人未歸南園無限樹獨自葉如幃

和張秀才落花有感

晴暖感餘芳紅苞雜絳房落時猶自舞掃後更聞香夢
罷收羅薦仙歸勅玉箱迴腸九迴後猶自剩迴腸

代越公房妓嘲徐公主

笑啼俱不敢幾欲是吞聲遽遣離琴怨都由半鏡明應
防啼與笑微露淺深情

代貴公主

芳條得意紅飄落忽西東分逐春風去風迴得故叢明
朝金井露始看憶春風

鳳

萬里峯巒歸路迷未判容彩借山雞新春定有將雛樂
阿閣華池兩處棲

昭肅皇帝挽歌詞三首

九縣懷雄武三靈仰睿文周王傳叔父漢后重神君玉
律朝驚露金莖夜切雲笳簫淒欲斷無復詠橫汾

玉塞驚宵拆金橋罷舉烽始巢阿閣鳳旋駕鼎湖龍門
咽通神鼓樓凝警夜鐘小臣觀吉從猶誤欲東封

莫驗昭華瑄虛傳甲帳神海迷求藥使雪隔獻桃人桂
寢青雲斷松扉白露新萬方同象鳥舉慟滿秋塵

梓州罷吟寄同舍

不揀花朝與雪朝五年從事霍嫖姚君緣接座交珠履
我為分行近翠翹楚雨含情皆有托漳濱卧病竟無憍
長吟遠下燕臺去唯有衣香染未銷

無題二首

鳳尾香羅薄，幾重碧。文圓頂，夜深縫扇裁。月魄羞難掩，
車走雷聲語未通。曾是寂寥金燼暗，斷無消息石榴紅。
斑駁只繫垂楊岸，何處西南待好風。

重幃深下莫愁堂，卧後清宵細細長。神女生涯元是夢，

小姑居處本無郎。

古詩有小姑無郎之句

風波不信菱枝弱，月露

誰教桂葉香。直道相思了無益，未妨惆悵是清狂。

病中早訪招國李十將軍過挈家遊曲江

十頃平波溢岸清
病來唯夢此中行
相如未是真消渴
猶放淹江過錦城

昨日

昨日紫姑神去也
今朝青鳥使來賒
未容言語還分散
少得團圓足怨嗟
二八月輪蟾影破
十三絃柱鴈行斜
平明鐘後更何事
笑倚牆邊梅樹花

櫻桃花下

流鶯舞蝶兩相欺
不取花芳正結時
他日未開今日謝

嘉辰長短是參差

故驛迎弔故桂府常侍有感

飢烏翻樹晚雞啼泣過秋原沒馬泥二紀征南恩與舊
此時丹旄玉山西

槿花

風露淒淒秋景繁可憐榮落在朝昏未央宮裏三千女
但保紅顏莫保恩

暮秋獨遊曲江

荷葉生時春恨生
荷葉枯時秋恨成
深知身在情長在
悵望江頭江水聲

任弘農尉獻州刺史乞假歸京

黃昏封印點刑徒
愧負荆山入座隅
却羨下和雙削足
一生無復沒階趨

贈勾芒神

佳期不定春期賒
春物天闕興咨嗟
願得勾芒索青女
不教容易損年華

無愁果有愁曲北齊歌

東有青龍西白虎中含福星包世度玉壺涓水笑清潭
鑿天不到牽牛處騏驎踏雲天馬擗牛山撼碎珊瑚聲
秋娥點滴不成淚十二玉樓無故釘推煙唾月拋千里
十番紅桐一行死白楊別屋鬼迷人空留暗記如蠶紙
日暮向風牽短絲血凝血散今誰是

房中曲

薔薇泣幽素翠帶花錢小嬌郎癡若雲抱日西簾曉枕

是龍宮石割得秋波色玉簫失柔膚但見蒙羅碧憶得
前年春未語含悲辛歸來已不見錦瑟長於人今日澗
底松明日山頭葉愁到天池翻相看不相識

齊梁晴雲

緩逐煙波起如妬柳綿飄故臨飛閣度欲入迴陂銷縈
歌憐畫扇故景弄柔條更耐天南位牛渚宿殘宵

效徐陵體贈更衣

密帳真珠絡溫幃翡翠裝楚腰知便寵宮眉正鬪強結

帶懸拖子繡領刺鴛鴦輕寒衣省夜金斗熨沈香

又效江南曲

郎船安兩槳儂舸動雙橈掃黛開宮額裁裙約楚腰乖
期方積思臨醉欲拌嬌莫以採菱唱欲羨秦臺簫

月夜重寄宋華陽姊妹

偷桃竊藥事難兼十二城中鎖彩蟾應共三英同夜賞
玉樓仍是水精簾

訪人不遇留別館

卿卿不惜瑣窓春，去作長楸走馬身。
閒倚繡簾吹柳絮，日高深院斷無人。

雨中長樂水館送趙十五滂不及

碧雲東去雨雲西，苑路高高驛路低。
秋水綠蕪終盡分，夫君太騁錦障泥。

汴上送李郢之蘇州

人高詩苦滯夷門，萬里梁王有舊園。
煙幌自應憐白紵，月樓誰伴詠黃昏。
露桃塗額依苔井，風柳誇腰住水村。

蘇小小墳今在否紫蘭香逕與招魂

贈鄭謹處士

浪跡江湖白髮新浮雲一片是吾身寒歸山觀隨棋局
暖入汀洲逐釣輪越桂留烹張翰鱠蜀薑供煮陸機尊
相逢一笑憐疎放他日扁舟有故人

復至裴明府所居

伊人卜築自幽深桂巷杉籬不可尋柱上雕蟲對書字
槽中瘦馬仰聽琴求之流輩豈易得行矣關山方獨吟

賒取松醪一斗酒與君相伴灑煩襟

覽古

莫恃金湯忽太平草間霜露古今情空糊楨壞真何益
欲舉黃旗竟不成長樂瓦飛隨水逝景陽鐘墮失天明
迴頭一弔箕山客始信逃堯不為名

子初郊墅

看山對酒君思我聽鼓離城我訪君臘雪已添牆下水
齋鐘不散檻前雲陰移竹栢濃還淡歌雜漁樵斷更聞

亦擬村南買煙舍子孫相約事耕耘

漢南書事

西師萬衆幾時迴哀痛天書近已裁
文吏何曾重刀筆將軍猶自舞輪臺
幾時拓土成王道從古窮兵是禍胎
陛下好生千萬壽玉樓長御白雲盃

當句有對

密邇平陽接上蘭秦樓鴛瓦漢宮盤
池光不定花光亂日氣初涵露氣乾
但覺遊蜂饒舞蝶豈知孤鳳憶離鸞

三星自轉三山遠紫府程遙碧落寬

井絡

井絡天彭一掌中漫誇天設劍為峯陣圖東聚燕江口
邊析西懸雪嶺松堪歎故君成社宇可能先主是真龍
將來為報奸雄輩莫向金牛訪舊蹤

寫意

燕鴈迢迢隔上林高秋望斷正長吟人間路有潼江險
天外山唯玉壘深日向花間留返照雲從城上結層陰

三年已制思鄉淚更入新年恐不禁

隨師東

東征日調萬黃金幾竭中原買鬪心軍令未聞誅馬謖

捷書唯是報孫歆

平吳之役上言得歆吳平孫尚在

但須鸞鷲巢阿閣

豈假鷓鴣在泮林可惜前朝玄菟郡積骸成莽陣雲深

宋玉

何事荆臺百萬家唯教宋玉擅才華楚詞已不饒唐勒
風賦何曾讓景差落日渚宮供觀閣開年雲夢送煙花

可憐庾信尋荒徑猶得三朝托後車

韓同年新居餞韓西迎家室戲贈

籍籍征西萬戶侯新緣貴壻起朱樓一名我漫居先甲
千騎君翻在上頭雲路招邀迴彩鳳天河迢遞笑牽牛
南朝禁鬻無人近瘦盡瓊枝詠四愁

奉和太原公送前楊秀才戴兼招楊正字戎

潼關地接古弘農萬里高飛鴈與鴻桂樹一枝當白日
芸香三代繼清風仙舟尚惜垂雙美綵服何由得盡同

誰憚士龍多笑疾美髭終類晉司空

池邊

玉管葭灰細細吹流鶯上下燕參差日西千繞池邊樹
憶把枯條撼雪時

賈生

宣室求賢訪逐臣賈生才調更無倫可憐夜半虛前席
不問蒼生問鬼神

送王十三校書分司

多少分曹掌秘文洛陽花雪夢隨君定知何遜緣聯句
每到城東憶范雲

寄惱韓同年時韓住蕭洞二首

簾外辛夷定已開開時莫放豔陽迴年華若到經風雨
便是胡僧話劫灰

龍山晴雪鳳樓霞洞裏迷人有幾家我為傷春心自醉
不勞君勸石榴花

謁山

從來繫日乏長繩
水去雲迴恨不勝
欲就麻姑買滄海
一盃春露冷如冰

釣天

上帝釣天會衆靈
昔人因夢到青冥
伶倫吹裂孤生竹
却為知音不得聽

失猿

祝融南去萬重雲
清嘯無因更一聞
莫遣碧江通箭道
不教腸斷憶離羣

戲題友人壁

花逕逶迤柳巷深
小闌亭午嘯春禽
相如解作長門賦
却用文君取酒金

假日

素琴絃斷酒餅空
倚坐歌眠日已中
誰向劉伶天幕內
更當陶令北窓風

寄遠

姮娥搗藥無時已
玉女投壺未肯休
何日桑田俱變了

不教伊水向東流

王昭君

毛延壽畫欲通神
忍為黃金不為人
馬上琵琶行萬里
漢宮長有隔生春

舊將軍

雲臺高議正紛紛
誰定當時蕩寇勳
日暮灞陵原上獵
李將軍是舊將軍

曼倩詞

十八年來墮世間
瑤池歸夢碧桃間
如何漢殿穿針夜
又向窓中覩阿環

所居

窓下尋書細溪邊坐石平
水風醒酒病霜日曝衣輕
雞黍隨人設蒲魚得地生
前賢無不謂容易卽遺名

高松

高松出衆木伴我向天涯
客散初晴後僧來不語時
有風傳雅韻無雪試幽姿
上藥終相待他年訪伏龜

訪秋

酒薄吹還醒樓危望已窮江臯當落日帆席見歸風煙
帶龍潭白霞分鳥道紅殷勤報秋意只是有丹楓

昭郡

桂水春猶早昭川日正西虎當官路鬪猿上驛樓啼繩
爛金沙井松乾乳洞梯鄉音吁可駭仍有醉如泥

哭劉司戶蕢

路有論冤謫言皆在中興空聞遷賈誼不待相孫弘江

濶唯迴首天高但撫膺去年相送地春雪滿黃陵

裴明府居止

愛君茅屋下向晚水溶溶試墨書新竹張琴和古松坐
來聞好鳥歸去度踈鐘明日還相見橋南貰酒醲

陸發荆南始至商洛

昔去真無奈今還豈自知青辭木奴橘紫見地仙芝四
海秋風濶千巖暮景遲向來憂際會猶有五湖期

陳後宮

玄武開新苑龍舟燕幸頻
渚蓮參法駕沙鳥犯鉤陳
壽獻金莖露歌翻玉樹塵
夜來江令醉別詔宿臨春

樂遊

春夢亂不記春原登已重
青門弄煙柳紫閣舞雲松
拂硯輕冰散開樽綠酎濃
無惊托詩遣吟罷更無惊

贈子直花下

池光忽隱牆花氣亂侵房
屏緣蝶留粉窻油蜂印黃
官書推小吏侍史從清郎
並馬更吟去尋思有底忙

小園獨酌

柳帶誰能結花房未肯開
空餘雙蝶舞竟絕一人來
半展龍鬚席輕斟馬腦盃
年年春不定虛信歲前梅

思歸

固有樓堪倚能無酒可傾
嶺雲春沮洳江月夜晴明
魚亂書何托猿哀夢易驚
舊居連上苑時節正遷鶯

獻寄舊府開封公

幕府三年遠春秋一字褒
書論秦逐客賦續楚離騷
地

金...
卷中
里南溟濶天文北極高
酬恩撫身世未覺勝鴻毛

向晚

當風橫去慙臨水卷空幃
北土鞦韆罷南朝袂襖歸
花情羞脉脉柳意悵微微
莫歎佳期晚佳期自古稀

春遊

橋峻斑駁疾川長白鳥高
煙輕唯潤柳風濫欲吹桃
徙倚三層閣摩挲七寶刀
庾郎年最少青草妬春袍

離席

出宿金樽掩從公玉帳新依依向餘照遠遠隔芳塵細
草翻驚鴈殘花伴醉人楊朱不用勸只是更沾巾

俳諧

短顧何由遂遲光且莫驚鶯能歌子夜蝶解舞宮城柳
訝眉傷淺桃猜粉太輕年華有情狀吾敢恠平生

細雨

蕭洒傍迴汀依微過短亭氣涼先動竹點細未開萍稍
促高高燕微竦的的螢故園煙草色仍近五門青

商於新開路

六百商於路崎嶇古共聞
蜂房春欲暮虎穿日初曛
路向泉間辨人從樹杪分
更誰開捷徑速擬上青雲

題鄭大有隱居

結構何峯是喧聞此地分
石梁高瀉月樵路細侵雲偃
卧蛟螭室希夷鳥獸羣
近知西嶺上玉管有時聞

君居
近子

晉憩
鶴臺

夜飲

卜夜容衰鬢開筵屬異方燭分歌扇淚雨送酒船香江
海三年客乾坤百戰場誰能辭酌酌淹卧劇清漳

江上

萬里風來地清江北望樓雲通梁苑路月帶楚城秋刺
字從漫滅歸途尚阻修前程更煙水吾道豈淹留

涼思

客去波平檻蟬休露滿枝永懷當此節倚立自移時北
斗兼春遠南陵寓使遲天涯占夢數疑誤有新知

鸞鳳

舊鏡鸞何處
衰桐鳳不棲
金錢饒孔雀
錦段落山雞
王子調清管
天人降紫泥
豈無雲路分
相望不應迷

李衛公

絳紗弟子音塵絕
鸞鏡佳人舊會稀
今日致身歌舞地
木棉花暖鷓鴣飛

韋蟾

謝家離別正淒涼
少傅臨歧賭佩囊
却憶短亭迴首處

夜來煙雨滿池塘

自貶

陶令棄官後仰眠書屋中誰將五斗米擬換北窓風

蝶

孤蝶小徘徊翩翾粉翅開併應傷皎潔頻近雪中來

夜意

簾垂幕半卷枕冷被仍香如何為相憶魂夢過瀟湘

因書

絕徼南通棧孤城北枕江猿聲連月檻烏影落天牕海
石分棊子耶筒當酒缸生歸話辛苦別夜對凝缸

奉寄安國大師兼簡子蒙

憶奉蓮花座兼聞貝葉經巖光分蠟屐澗響入銅瓶日
下徒推鶴天涯正對螢魚山羨曹植眷屬有文星

間遊

危亭題竹粉曲沼嗅荷花數日同攜酒平明不在家尋
幽殊未極得句總堪誇強下西樓去西樓倚暮霞

縣中惱飲席

晚醉題詩贈物華
罷吟還醉忘歸家
若無江氏五色筆
爭奈河陽一縣花

題李上暮壁

舊著思玄賦
新編雜擬詩
江庭猶近別山舍
得幽期嫩
割周顯韭肥烹鮑
照葵飽聞南燭酒
仍及撥醅時

江村題壁

沙岸竹林森森維
艖聽越禽數家
同老壽一選自陰
深喜

客嘗留橘應官說採金傾壺真得地愛日靜霜砧

卽日

桂林聞舊說曾不異炎方

宋考功有小長安之句也

山響匡牀語花

飄度臘香幾時逢馮足著處斷猿腸獨撫青青桂臨城
憶雪霜

漫成五章

沈宋裁詞矜變律王楊落筆得良朋當時自謂宗師妙
今日唯觀對屬能

李杜操持事畧齊三才萬象共端倪集仙殿與金鑾殿
可是蒼蠅惑曙雞

生兒古有孫征虜嫁女今無王右軍借問琴書終一世
何如旗蓋仰三分

代北偏師銜使節關東裨將建行臺不妨常日饒輕薄
且喜臨戎用草萊

郭令素心非黷武韓公本意在和戎兩都耆舊偏垂淚
臨老中原見朔風

射魚曲

思牢弩箭磨青石繡額蠻渠三虎力尋潮背日伺泗鱗
貝闕夜移鯨失色纖纖粉斝馨香餌綠鴨迴塘養龍水
含冰漢語遠於天何由迴作金盤死

日高

鍍銀故錦縈輕拖玉笈不動便門鎖水精眠夢是何人
攔藥日高紅髮疑飛香上雲春訴天雲梯十二門九闕
輕身滅影何可望粉蛾帖死屏風上

宮中曲

雲母瀝宮月夜夜白於水賺得羊車來低扇遮黃子水
精不覺冷自刻鴛鴦翅蠶縷茜香濃正朝纏左臂巴牋
兩三幅滿寫承恩字欲得識青天昨夜蒼龍是

海上謠

桂水寒於江玉兔秋冷咽海底覓仙人香桃如瘦骨紫
鸞不肯舞滿翅蓬山雪借得龍堂寬曉出探雲段劉郎
舊香炷立見茂陵樹雲孫帖帖卧秋煙上元細字如蠶

眠

李夫人三首

一帶不結心兩股方安髻慙愧白茅人月沒教星替
剩結茱萸枝多擘秋蓮的獨自有波光綵囊盛不得

蠻絲繫條脫妍眼和香屑壽宮不惜鑄南人柔腸早被
秋眸割清澄有餘幽素香鰓魚渴鳳真珠房不知瘦骨
類冰井更許夜簾通曉霜土花漠漠雲茫茫黃河欲盡
天蒼黃

景陽宮井雙桐

秋港菱花乾玉盤明月蝕血滲兩枯心情多去未得徒
經白門伴不見丹山客未待刻作人愁多有魂魄誰將
玉盤與不死翻相誤天更濶於江孫枝覓郎主昔妬隣
宮槐道類雙眉斂今日繁紅櫻拋人占長簾翠襦不禁
綻留淚啼天眼寒灰劫盡問方知石羊不去誰相絆

秋日晚思

桐槿日零落雨餘方寂寥
枕寒莊蝶去窻冷肩螢銷
取

適琴將酒忘名牧與樵平生有遊舊一一在青霄

春宵自遣

地勝遺塵事身閒念歲華晚晴風過竹深夜月當花石
亂知泉咽苔荒任徑斜陶然恃琴酒忘却在山家

七夕偶題

寶婺搖珠珮常娥照玉輪靈歸天上匹巧遺人間人花
果香千戶笙竽溢四隣明朝臘犢鼻方信阮郎貧

靈仙閣晚眺寄鄆州韋評事

愚公方住谷仁者本依山共誓林泉志胡為樽俎間華
蓮開菡萏荆玉刻孱顏爽氣臨周道嵐光出漢關滿壺
從蟻泛高閣已苔斑想就安車召寧期負矢還潘遊全
壁散郭去半舟間定笑幽人迹鴻軒不可攀

幽居冬暮

羽翼摧殘日郊園寂寞時曉雞驚樹雪寒鷺守冰池急
景歲云暮頽年寢已衰如何匡國分不與夙心期

過姚孝子廬偶書

金史卷之八十一
卷中
拱木臨周道荒廬積古苔魚因感姜出鶴為弔陶來兩
鬢蓬常亂雙眸血不開聖朝敦爾類非獨路人哀

賦得月照冰池詩

皓月方離海堅冰正滿池金波雙激射璧彩兩參差影
占徘徊處光含的皪時高低連素色上下接清規顧兔
飛難定潛魚躍未期鵲驚俱欲遠狐聽始無疑似鏡將
盈手如霜恐透肌獨憐遊翫意達曉不知疲

永樂縣所居一草一木無非自栽今春悉已芳茂

因書卽事一章

手種悲陳事，心期翫物華。
柳飛彭澤雪，桃散武陵霞。
枳嫩棲鸞葉，桐香待鳳花。
綬藤縈弱蔓，袍草展新芽。
學植功雖倍，成蹊跡尚賒。
芳年誰共翫，終老邵平瓜。

南潭上亭讌集以疾後至因而抒情

馬卿聊應召，謝傅已登山。
歌發百花外，樂調深竹間。
鷓舟縈遠岸，魚鑰啓重關。
鶯蝶如相引，煙蘿不暇攀。
佳人啓玉齒，上客頷朱顏。
肯念沉疴士，俱期倒載還。

寒食行次冷泉驛

歸途仍近節旅宿倍思家
獨夜三更月空庭一樹花
介山當驛秀汾水遶關斜
自怯春寒苦那堪禁火賒

寄華嶽孫逸人

靈嶽幾千仞老松逾百尋
攀崖仍躡壁啜葉復眠陰
海上呼三島齋中戲五禽
唯應逢阮籍長嘯作鸞音

戲題贈稷山驛吏王全

全為驛吏五十六年人稱有道術往來多贈詩章

絳臺驛吏老風塵
耽酒成仙幾十春
過客不勞詢甲子

唯書亥字與時人

和韋潘前輩七月十二日夜泊池州城下先寄上

李使君


桂含爽氣三秋首
莫吐中旬二葉新
正是澄江如練處
玄暉應喜見詩人

花下醉

尋芳不覺醉流霞
倚樹沉眠日已斜
客散酒醒深夜後
更持紅燭賞殘花

所居永樂縣久旱縣宰祈禱得雨因賦詩

井膏滴滴是精誠
晝夜如絲一夕盈
祇怪閭閻喧鼓吹
邑人同報東長生



李義山詩集卷中